

BAHAYA LIBERALISME

الْحَمْدُ لِلَّهِ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ لِيُظْهِرَهُ عَلَى الدِّينِ كُلِّهِ وَلَوْ

كَرِهَ الْمُشْرِكُونَ، أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،

وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ،

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ وَمَنْ تَبِعَهُمْ

بِإِحْسَانٍ إِلَى يَوْمِ الدِّينِ.

أَمَّا بَعْدُ،

فِيَا عِبَادَ اللَّهِ، اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Marilah kita bersama-sama meningkatkan ketakwaan kepada Allah Subhanahu wa-Ta'ala dengan melaksanakan segala perintah dan meninggalkan segala larangan-Nya. Mudah-mudahan kita diberkati Allah Subhanahu wa-Ta'ala di dunia dan akhirat.

Sidang Jumaat yang dirahmati Allah Subhanahu wa-Ta'ala,

Liberalisme adalah satu fahaman yang menuntut kebebasan hidup tanpa batasan kerana kononnya untuk menjaga hak asasi manusia. Fahaman ini mengajak umat Islam berfikir dengan bebas mengikut logik akal semata-mata dengan mengeneipkan ajaran agama Islam yang berpandukan kepada al-Quran dan al-Sunnah.

Sekiranya fahaman ini disekat, dihalang atau didakwa, maka golongan ini dengan pantas mencanang kepada satu dunia bahawa hak kebebasan mereka telah dicabuli. Penganut fahaman ini mendakwa bahawa agama Islam mengongkong, jumud, membataskan kemajuan malah cuba menakut-nakutkan masyarakat dengan menafikan pelaksanaan undang-undang Islam yang didakwa sebagai tidak mengikut perlembagaan, tidak adil, zalim, dan tidak sesuai dilaksanakan dalam masyarakat berbilang kaum dan agama, sedangkan agama Islam adalah agama yang syumul yang diturunkan oleh Allah Subhanahu wa-Ta'ala

Yang Maha Mengetahui, lengkap meliputi peraturan, undang-undang yang mengatur kehidupan manusia dalam semua aspek untuk kesejahteraan hidup manusia. Firman Allah Subhanahu wa-Ta'ala dalam surah Ali Imran ayat 83:

أَعُوذُ بِاللَّهِ مِنَ الشَّيْطَانِ الرَّجِيمِ
أَفَغَيْرَ دِينِ اللَّهِ يَبْغُونَ وَلَهُ أَسْلَمَ مَنْ فِي السَّمَوَاتِ وَالْأَرْضِ طَوْعًا
وَكَرْهًا وَإِلَيْهِ يُرْجَعُونَ ﴿٨٣﴾

Yang bermaksud: *“Patutkah sesudah (mengakui dan menerima perjanjian) itu, mereka mencari lain dari Agama Allah? Padahal kepada-Nya lah tunduk taat sekalian makhluk yang ada di langit dan di bumi, sama ada dengan sukarela ataupun terpaksa, dan kepada-Nya lah mereka dikembalikan”*.

Sidang Jumaat yang dirahmati Allah Subhanahu wa-Ta'ala,

Sebagai contoh, berita yang pernah dipaparkan dalam media mengaitkan idea songsang daripada suatu kumpulan yang mendakwa bahawa perbuatan khalwat di tempat peribadi adalah dosa peribadi antara pelakunya dengan Allah Subhanahu wa-Ta'ala. Malah perlakuan ini tidak boleh dikatakan berkhalwat atas alasan ia dilakukan di rumah persendirian. Mereka juga mencadangkan supaya hukuman terhadap kesalahan berkhalwat dimansuhkan, kerana didakwa melanggar hak kebebasan seseorang.

Pemikiran apakah ini? Adakah ideologi ini yang akan diwariskan kepada anak cucu kita? Adakah ini yang diinginkan oleh pejuang kebebasan? Bebas berkhalwat dan hasilnya kita melihat bayi yang tidak berdosa dibuang bagaikan bangkai binatang? Jangan terkejut, jika kita menemui bayi di hadapan rumah yang merupakan anak atau cucu kepada pejuang kebebasan itu sendiri. Adakah kebebasan ini yang dikehendaki?

Sidang Jumaat yang dirahmati Allah Subhanahu wa-Ta'ala,

Mimbar ingin menegaskan bahawa matlamat undang-undang kesalahan khalwat digubal adalah bertujuan mengawal dan mencegah daripada berlakunya kesalahan yang lebih besar iaitu zina. Islam juga memberi peringatan untuk mencegah sesuatu yang mungkar bagi menjamin kemaslahatan umat Islam daripada terjerumus ke lembah kebinasaan. Oleh sebab itu, Islam menetapkan supaya lima asas maqasid syariah wajib dijaga dan dipelihara oleh kita semua iaitu menjaga agama, nyawa, keturunan, akal dan harta.

Firman Allah Subhanahu wa-Ta'ala dalam surah al-Isra' ayat 32:

وَلَا تَقْرَبُوا الزَّيْنَىٰ إِنَّهُ كَانَ فَحِشَةً وَسَاءَ سَبِيلًا ﴿٣٢﴾

Yang bermaksud: *“Dan janganlah kamu menghampiri zina, sesungguhnya zina itu adalah satu perbuatan yang keji dan satu jalan yang jahat (yang membawa kerosakan)”*.

Hadis daripada Ibnu Abbas Radiyallahu-anhu bahawa Rasulullah Sallalla-hu-alaihi-wasallam bersabda yang bermaksud; *“Wahai manusia! Sesungguhnya aku tinggalkan untuk kamu dua perkara jika kamu berpegang kepadanya kamu tidak akan sesat selamanya; kitab Allah (al-Quran) dan sunnahku.”*

Sidang Jumaat yang dirahmati Allah Subhanahu wa-Ta’ala,

Perlu diingat konsep kebebasan dalam Islam ada batas dan sempadan yang perlu dipatuhi. Umat Islam dilarang sama sekali melakukan kemungkar dan maksiat secara bebas mengikut kehendak hawa nafsu. Melihat kepada ideologi liberalisme yang bertentangan dengan syariat Islam, maka Mesyuarat Khas Jawatankuasa Perundingan Hukum Syarak Negeri Pahang bertarikh pada 19 february 2014 telah memutuskan bahawa aliran pemikiran liberal adalah suatu ajaran sesat dan menyeleweng daripada syariat Islam.

Sidang Jumaat yang dirahmati Allah Subhanahu wa-Ta’ala,

Mengakhiri khutbah ini, marilah kita renung dan ambil pengajaran serta penghayatan yang memberi manfaat dalam hidup iaitu kita dituntut supaya kembali kepada petunjuk al-Quran dan as-Sunnah dan hendaklah memastikan agar tidak terpedaya dengan pemikiran liberalisme yang boleh melemahkan iman. Dengan itu, marilah kita bersama-sama menentang fahaman ini kerana ia merosakkan akidah generasi hari ini dan akan datang.

Firman Allah Subhanahu wa-Ta'ala di dalam Surah al-Ahzab ayat 36:

أَعُوذُ بِاللَّهِ مِنَ الشَّيْطَانِ الرَّجِيمِ
وَمَا كَانَ لِمُؤْمِنٍ وَلَا مُؤْمِنَةٍ إِذَا قَضَى اللَّهُ وَرَسُولُهُ أَمْرًا أَنْ يَكُونَ لَهُمُ الْخِيَرَةُ
مِنْ أَمْرِهِمْ ^ط وَمَنْ يَعِصِ اللَّهَ وَرَسُولَهُ فَقَدْ ضَلَّ ضَلًّا مُبِينًا ﴿٣٦﴾

Yang bermaksud: “ *Dan tidaklah patut bagi lelaki dan perempuan yang beriman, apabila Allah dan Rasul-Nya telah menetapkan suatu ketetapan, akan ada bagi mereka pilihan (yang lain) tentang urusan mereka. Dan*

barangsiapa mendurhakai Allah dan Rasul-Nya maka sungguhlah dia telah sesat, sesat yang nyata.”

بَارِكْ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ

الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ، أَقُولُ قَوْلِي هَذَا وَاسْتَغْفِرُ اللَّهَ

الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، الْأَحْيَاءِ مِنْهُمْ

وَالْأَمْوَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ